

# **STATUT**

**KOŠARKAŠKOG SAVEZA BOSNE I HERCEGOVINE**

**Sarajevo, oktobar 2018. godine**

Na osnovu člana 12. Zakona o udruženjima i fondacijama Bosne i Hercegovine („Službeni glasnik BiH“, br. 32/01, 42/03, 63/08, 76/11 i 94/16) i člana 24. Statuta Košarkaškog saveza Bosne i Hercegovine, broj: 02/09 od 27.03.2009. godine, Skupština Košarkaškog saveza Bosne i Hercegovine, na sjednici održanoj 20.10.2018. godine u Busovači, donijela je

## **STATUT** **Košarkaškog saveza Bosne i Hercegovine**

### **I. OPŠTE ODREDBE**

#### **Član 1.**

Košarkaški savez Bosne i Hercegovine (u daljem tekstu: Savez) je osnovan Odlukom o osnivanju Košarkaškog saveza Bosne i Hercegovine na Osnivačkoj skupštini održanoj 27.03.2009. godine na osnovu Odluke o dobrovoljnom udruživanju Košarkaškog saveza Herceg-Bosne broj 98/09 od 23.02.2009, Košarkaškog saveza Republike Srpske broj 93/09 od 20.03.2009. godine, Košarkaškog saveza Zenica broj 101/09 od 25.03.2009. godine, Košarkaškog saveza Kantona Sarajevo broj 079/09 od 25.03.2009. godine, Regionalnog košarkaškog saveza Tuzla broj 14/09 od 25.03.2009. godine, u skladu sa Zakonom o udruženjima i fondacijama Bosne i Hercegovine i upisan u Registar udruženja Ministarstva pravde Bosne i Hercegovine pod registarskim brojem RU-892/09 od 24.11.2009. godine.

#### **Član 2.**

Ovim Statutom u skladu sa članom 12. Zakona o udruženjima i fondacijama Bosne i Hercegovine (u daljem tekstu: Zakon) uređuje se:

- naziv, skraćeni naziv i adresa Saveza;
- ciljevi i djelatnosti Saveza;
- postupak za primanje i isključenje članova;
- organi Saveza, način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove Skupštinu, uslovi i način raspuštanja, odnosno prestanka rada;
- pravila za ostvarivanje, korištenje i raspolaganje sredstvima Saveza, kao i organ koji je ovlašten za vršenje nadzora nad korištenjem tih sredstava;
- javnost rada Saveza;
- postupak izmjene i dopune Statuta, ovlaštenje i donošenje drugih opštih akata;
- oblik i sadržaj pečata i znaka Saveza;
- zastupanje i predstavljanje Saveza;
- uslove i postupak za spajanje i podjelu odnosno prestanak rada Saveza, uključujući i poseban kvorum i postizanje kvalifikovane većine u postupku glasanja;
- postupak za raspolaganje preostalim imovinom ili sredstvima u slučaju raspuštanja ili prestanka rada Saveza;
- druga pitanja značajna za rad i djelovanje Saveza;

#### **Član 3.**

Savez je nevladina, nezavisna, dobrovoljna i vanstranačka organizacija osnovana radi unapređenja i ostvarivanja zajedničkih interesa i ciljeva članova Saveza, u skladu sa Zakonom, a čija svrha nije sticanje dobiti.

#### **Član 4.**

Savez ne dopušta rasnu, nacionalnu, vjersku, polnu i političku diskriminaciju, te kršenje sloboda i prava čovjeka.

#### **Član 5.**

Savez ima svojstvo pravnog lica, koje je steklo danom upisa u Registar udruženja kod Ministarstva pravde Bosne i Hercegovine.

Savez može promjeniti naziv, sjedište i znak, o čemu odluku donosi Skupština Saveza.

#### **Član 6.**

Savez djeluje na cijelom području Bosne i Hercegovine.

## **II. NAZIV I SJEDIŠTE SAVEZA**

#### **Član 7.**

Naziv Saveza je:

KOŠARKAŠKI SAVEZ BOSNE I HERCEGOVINE

КОШАРКАШКИ САВЕЗ БОСНЕ И ХЕРЦЕГОВИНЕ

KOŠARKAŠKI SAVEZ BOSNE I HERCEGOVINE

Skraćeni naziv Saveza je:

KS BiH

КС БиХ

KS BiH

Naziv Saveza je istovjetan na sva tri jezika koja su u upotrebi u Bosni i Hercegovini, a službena upotreba naziva je na latiničnom i ćirilichnom pismu.

#### **Član 8.**

Sjedište Saveza je u Sarajevu, Ulica Branilaca Sarajeva broj 11/III.

## **III. CILJEVI I DJELATNOSTI SAVEZA**

#### **Član 9.**

Ciljevi i djelatnosti Saveza su:

- razvoj i unapređenje košarkaškog sporta u Bosni i Hercegovini;
- usklađivanje i koordiniranje rada;
- međunarodna sportska saradnja;
- saradnja sa odgovarajućim državnim, društvenim, naučnim i stručnim organizacijama i drugim organima i organizacijama na realizaciji zadataka i projekata od zajedničkog interesa;

- donošenje dugoročnih i kratkoročnih programa razvoja košarkaškog sporta u Bosni i Hercegovini;
- zastupanje i predstavljanje u Međunarodnoj košarkaškoj federaciji (FIBA);
- obrazovanje i usavršavanje kadrova/trenera, instruktora, sudija;
- donošenje osnova sistema i kalendara takmičenja Saveza i njihova realizacija u saradnji sa udruženim organizacijama;
- organizovanje domaćih i međunarodnih košarkaških takmičenja u Bosni i Hercegovini;
- briga o pripremama kandidata za Olimpijske igre, svjetska i evropska prvenstva i velika regionalna međunarodna takmičenja, kao i o svim državnim reprezentacijama i selekcijama;

#### **Član 10.**

Osnovna načela na kojima se organizuje košarkaški sport su:

- prava i sloboda sportista,
- afirmacija duha olimpizma,
- pravo svih građana da se bave košarkaškim sportom pod jednakim uslovima bez obzira na nacionalnu, vjersku, političku, rasnu, materijalna i društvena stimulacija za ostvarivanje vrhunskih sportskih rezultata u košarkaškom sportu,
- sportsko napredovanje i usavršavanje, materijalna i društvena stimulacija za ostvarivanje vrhunskih sportskih rezultata u košarkaškom sportu,
- organizovanje efikasnog sistema stručnog osposobljavanja i usavršavanja stručnih kadrova u košarkaškom sportu,
- obezbjeđivanje zdravstvene zaštite košarkaša i košarkašica i spriječavanje upotrebe nedozvoljenih stimulativnih sredstava,
- stručnost u radu i podsticanje naučno-istraživačkog rada, primjena savremenih metoda rada, informatičke tehnologije i izdavačke djelatnosti,
- pravilo da su se svi sporovi između sportista, sportskih organizacija i organa u košarkaškom sportu rješavaju isključivo preko i unutar odgovarajućih sportskih ograna i arbitražnih sportskih tijela.

#### **Član 11.**

Savez je član FIBA (Međunarodne košarkaške federacije).

Savez je član Olimpijskog komiteta Bosne i Hercegovine.

Savez se može udruživati i u druge sportske asocijacije pod uslovom da to doprinosi ostvarivanju ciljeva košarkaškog sporta. Odluku o udruživanju donosi Skupština Saveza.

#### **Član 12.**

Savez priznaje, prihvata, primjenjuje i pridržava se važećih statuta, pravila i propisa FIBA, kao i svih budućih amandmana važećih akata.

#### **Član 13.**

Za nastupanje na međunarodnim košarkaškim takmičenjima formiraju se košarkaške reprezentacije – selekcije u skladu sa međunarodnim sistemom i programom takmičenja.

#### **Član 14.**

Pod nastupom za košarkašku reprezentaciju – selekciju Bosne i Hercegovine podrazumijevaju se svi nastupi na međunarodnim susretima reprezentacija, kao i nastupi na Olimpijskim igrama, prvenstvima Svijeta i Evrope, Univerzijadi, Mediteranskim igrama i Balkanskim prvenstvima.

Reprezentativac – član selekcije dužan je da ispunjava sve obaveze iz programa nastupa reprezentacije – selekcije za koju je izabran. U protivnom, podliježe disciplinskoj odgovornosti u skladu sa Pravilnikom o disciplinskoj odgovornosti.

#### **IV. POSTUPAK ZA PRIMANJE I ISKLUČENJE ČLANOVA**

##### **Član 15.**

Članovi Saveza su: Košarkaški savez Herceg-Bosne, Košarkaški savez Republike Srpske, Košarkaški savez Zenice, Košarkaški savez Kantona Sarajevo, Regionalni košarkaški savez Tuzla.

Svaki član Saveza može pokrenuti postupak pred nadležnim sudom za utvrđivanje ništavnosti općeg akta Saveza koji je donesen suprotno odredbama Statuta ili drugog općeg akta Saveza, a najkasnije u roku od šest mjeseci od dana donošenja tog akta.

Pristupnica za prijem u članstvo predaje se Upravnom odboru Saveza, koji odlučuje o prijemu u članstvo. Na odluku o prijemu u članstvo nezadovoljna strana ima pravo žalbe Skupštini Saveza.

##### **Član 16.**

Članovi Saveza imaju jednaka prava da:

- preko svojih predstavnika aktivno učestvuju u radu i odlučivanju u svim organima i tijelima Saveza;
- njihovi predstavnici biraju i budu birani u organe i tijela Saveza;
- aktivno učestvuju u utvrđivanju programa i plana rada Saveza, i učestvuju u njihovoj realizaciji;
- ostvaruju međunarodnu saradnju u skladu sa programom međunarodne saradnje Saveza, uvažavajući i pravo na posebne odnose sa regionalnim košarkaškim asocijacijama u skladu sa FIBA propisima;
- ostvaruju zaštitu svojih prava.

##### **Član 17.**

Članovi Saveza su obavezni da:

- poštuju Statut, pravilnike i odluke Saveza;
- čuvaju ugled Saveza;
- učestvuju u postupku odlučivanja, izbora i opoziva;
- poštuju akta, odredbe i odluke FIBA, kao i da poštuju i primjenjuju zvanična pravila igre usvojena i objavljena od strane FIBA;
- izbjegavaju bilo kakvu diskriminaciju, stvaranje i favorizovanje bilo kakvih udruživanja, koja ugrožavaju jedinstvo košarkaškog sporta u Bosni i Hercegovini;
- poštuju principe fer-pleja i dosljedno ih se pridržavaju u svom djelovanju;
- čine sve da onemoguće bilo kakvu rasnu, političku, vjersku, polnu ili rasnu diskriminaciju i spriječe favorizovanje interesa bilo koje sredine na štetu opštih interesa u košarkaškom sporu u cijelini;
- sprječavaju upotrebu nedozvoljenih stimulativnih sredstava;
- obezbjeđuju adekvatnu zaštitu sportista;

- osiguravaju bezbjednost učesnika u takmičenju;
- obezbjeđuju stručno obrazovanje i usavršavanje;
- respektuju i promovišu interese Saveza.

#### **Član 18.**

Članstvo u Savezu prestaje:

1. dobrovoljnim istupanjem člana Saveza;
2. zbog nepridržavanja odredaba Statuta, pravilnika i odluka Saveza;
3. gubljenjem svojstva pravnog lica;
4. prestankom rada Saveza.

#### **Član 19.**

Odluke o prestanku članstva u Savezu donose se u skladu sa članom 20. ovog Statuta.

Član Saveza može povući svoje članstvo iz Saveza po vlastitoj volji na kraju finansijske godine pod uslovom da je to najavio kancelariji Saveza najkasnije 3 mjeseca prije isteka finansijske godine.

Povlačenje se najavljuje pismeno preporučenom poštom na adresu kancelarije Saveza.

Član Saveza mora izmiriti svoje finansijske obaveze prema Savezu prije nego što se povuče.

#### **Član 20.**

Član Saveza koji djeluje suprotno odredbama ovog Statuta, ne izvršava svoje obaveze ili svojim postupcima narušava ugled Saveza može biti isključen iz Saveza.

Prije donošenja odluka o isključenju, član Saveza mora biti pismeno obavješten o prijedlogu za isključenje, kao i razlozima zbog kojih se predlaže isključenje.

Odluku o prestanku svojstva člana Saveza donosi Upravni odbor Saveza.

Član koji je nezadovoljan odlukom iz prethodnog stava, može uložiti prigovor Skupštini Saveza u roku od 15 dana od dana prijema obavijesti.

Odluka Skupštine po žalbi je konačna.

### **V. ORGANI SAVEZA**

#### **Član 21.**

Organi Saveza su:

1. Skupština Saveza
2. Upravni odbor Saveza
3. Nadzorni odbor Saveza
4. Predsjednik Saveza
5. Generalni sekretar Saveza

#### **1. SKUPŠTINA**

#### **Član 22.**

Skupština Saveza je najviši organ Saveza.

Članovi Saveza učestvuju u upravljanju i odlučivanju u poslovima Saveza putem svojih delegata u Skupštini.

#### **Član 23.**

Skupštinu Saveza čine delegati birani iz Košarkaškog saveza Herceg-Bosne, Košarkaškog Saveza Republike Srpske, Košarkaškog saveza Kantona Sarajevo, Košarkaškog Saveza Zenica i Regionalnog košarkaškog saveza Tuzla.

Skupštinu Saveza čini 30 delegata, i to:

- 10 (deset) delegata iz Košarkaškog saveza Herceg-Bosne
- 10 (deset) delegata iz Košarkaškog saveza Republike Srpske
- 4 (četiri) delegata iz Košarkaškog saveza Kantona Sarajevo, i po
- 3 (tri) delegata iz Košarkaškog saveza Zenica i Regionalnog košarkaškog saveza Tuzla.

#### **Član 24.**

Skupština ima ovlaštenja da:

- donosi, mijenja i dopunjava Statut Saveza i drugih akata određenih Statutom;
- usvaja i donosi Poslovnik o radu Skupštine Saveza;
- razmatra i odobrava finansijske planove i izvještaje o finansijskom poslovanju Saveza;
- bira i razrješava članove Upravnog odbora;
- bira i razrješava predsjednika Skupštine;
- donosi odluku o promjeni naziva, sjedišta i znaka Saveza;
- razmatra i usvaja izvještaje koje je pripremio Upravni odbor Saveza;
- donosi odluku o spajanju i podjeli odnosno prestanku rada, kao i o drugim statusnim promjenama Saveza;
- donosi odluku o imenovanju lica za zastupanje i predstavljanje Saveza;
- bira i razrješava članove Nadzornog odbora Saveza;
- donosi odluke po žalbama članova Saveza u drugom stepenu;
- donosi odluku o visini godišnje članarine;
- obavlja i druge poslove koji nisu u nadležnosti drugih organa Saveza u skladu sa Zakonom, ovim Statutom i drugim aktima Saveza.

#### **Član 25.**

Redovne sjednice Skupštine održavaju se svakih 12 (dvanaest) mjeseci, po pravilu do kraja aprila.

Skupština ima predsjednika, kojeg bira Skupština na mandatni period od četiri godine, sa mogućnošću ponovnog izbora.

Predsjednik Skupštine je dužan sazvati Skupštinu:

- po svojoj ocjeni,
- na zahtjev Upravnog odbora,
- na zahtjev jednog od članova Saveza,
- na zahtjev 10 delegata Skupštine

Delegati Skupštine obavještavaju se o dnevnom redu najmanje 30 (trideset) dana prije održavanja sjednice.

Prijedlozi za izmjenu i dopunu normativnih akata Saveza koje donosi Skupština moraju biti dostavljeni delegatima Skupštine Saveza najkasnije 15 (petnaest) dana prije održavanja sjednice.

#### **Član 26.**

Skupština bira zapisničara na početku rada sjednice koji vodi zapisnik. Zapisnik mora da odražava bitan tok rada i suštinu svih odluka i stavova Skupštine.

Predsjednik Skupštine:

- stara se o organizovanju Skupštine i saziva njene sjednice;
- predlaže dnevni red sjednice;
- predsjedava sjednicama Skupštine;
- potpisuje akte donesene na Skupštini;
- stara se o izvršenju odluka, zaključaka i drugih akata Skupštine;
- vrši i druge poslove koje mu odredi Skupština u skladu sa Zakonom i ovim statutom.

#### **Član 27.**

Vanrednu sjednicu Skupštine saziva predsjednik Saveza:

- po svojoj ocjeni, a u saglasnosti sa dva potpredsjednika,
- na zahtjev Upravnog odbora Saveza,
- na zahtjev 10 delegata Skupštine,
- na zahtjev Nadzornog odbora

#### **Član 28.**

Izborna sjednica je svake četiri godine.

Mandat delegata Skupštine traje 4 (četiri) godine.

#### **Član 29.**

Delegatu Skupštine mandat može prestati i prije vremena na koji je izabran:

- opozivom
- ostavkom
- nastankom okolnosti usljed kojih nije u mogućnosti da obavlja svoju dužnost.

Delegatu Skupštine izabranom na mjesto delegata, kojem je prestao mandat u skladu sa stavom 1. ovog člana, mandat traje do isteka mandata Skupštine Saveza istog saziva.

#### **Član 30.**

Kvorum Skupštine čini natpolovična većina svih delegata Skupštine.

Skupština odlučuje natpolovičnom većinom prisutnih delegata, pod uslovom da za prijedlog glasaju najmanje 3 (tri) delegata iz Košarkaškog saveza Herceg-Bosne, 3 (tri) delegata iz Košarkaškog saveza Republike Srpske i po 1 (jedan) delegat iz Košarkaškog saveza Zenica, Košarkakog saveza Kantona Sarajevo i Regionalnog košarkaškog Saveza Tuzla.

O statutu i njegovim izmjenama i dopunama, statusnim promjenama Saveza Skupština odlučuje 2/3 većinom prisutnih delegata, pod uslovom da za prijedlog glasaju najmanje 6 (šest) delegata iz: Košarkaškog saveza Herceg-Bosne i Košarkaškog saveza Republike Srpske, i po 2 (dva) delegata iz:



Košarkaškog saveza Zenica, Košarkaškog saveza Kantona Sarajeva i Regionalnog košarkaškog saveza Tuzla.

Način rada Skupštine uređuje se Poslovníkom o radu Skupštine.

## **2. UPRAVNI ODBOR**

### **Član 31.**

Upravni odbor Saveza (u daljem tekstu: Upravni odbor) rukovodi radom Saveza u skladu sa Statutom i drugim opštim aktima Saveza.

Upravni odbor za svoj rad odgovara Skupštini.

Upravni odbor ima predsjednika i dva potpredsjednika i šest članova Upravnog odbora.

Predsjednik i potpredsjednici se rotiraju na svakih 16 mjeseci.

Članovi upravnog odbora se biraju na prijedlog članova Saveza i to:

- 3 iz Košarkaškog saveza Herceg-Bosne
- 3 iz Košarkaškog saveza Republike Srpske
- 3 iz Košarkaškog saveza Zenica, Košarkaškog saveza Kantona Sarajeva i Regionalnog košarkaškog saveza Tuzla.

Članove Upravnog odbora bira i razrješava Skupština na mandatni period od 4 (četiri) godine sa mogućnošću ponovnog izbora.

Predsjednik i potpredsjednici Upravnog odbora Saveza su ujedno i predsjednik i potpredsjednici Saveza.

### **Član 32.**

Članu Upravnog odbora može prestati mandat i prije vremena na koji je izabran:

- opozivom od strane člana Saveza koji ga je predložio,
- suspenzijom od strane Skupštine ili Upravnog odbora,
- ostavkom,
- nastankom okolnosti usljed kojih nije u mogućnosti obavljati svoju dužnost.

Članu Upravnog odbora izabranom na mjestu člana, kojem je prestao mandat u skladu sa stavom 1. ovog člana, mandat traje do isteka mandata Upravnog odbora istog saziva.

### **Član 33.**

Upravni odbor je nadležan za:

- upravlja radom Saveza;
- utvrđuje programe i planove;
- utvrđuje prijedlog Statuta Saveza i drugih opštih akata koje donosi Skupština;
- obezbjeđuje provođenje finansijskog plana Saveza i odlučuje o rasporedu i korištenju sredstava prema finansijskom planu;
- upravlja imovinom Saveza;
- određuje naredbodavca i utvrđuje ovlaštenja za finansijsko poslovanje;
- utvrđuje politiku međunarodne sportske saradnje i program međunarodnih takmičenja;

- predlaže Skupštini kandidate za predstavnike Saveza u domaćim i međunarodnim sportskim organizacijama i utvrđuje, u okviru usvojene međunarodne politike, stavove Saveza i sastav delegacije na kongresima i drugim zasjedanjima asocijacija čiji je član;
- bira i razrješava Generalnog sekretara Saveza;
- imenuje rukovodioca i rukovodstvo košarkaških reprezentacija Bosne i Hercegovine za pojedina međunarodna takmičenja i razmatra izvještaje sa tih takmičenja;
- donosi pravilnike: o organizaciji i sistematizaciji radnih mjesta u stručnoj službi Saveza, o disciplinskoj i materijalnoj odgovornosti, o nagradama i priznanjima Saveza i druge opšte akte Saveza iz svoje nadležnosti;
- odlučuje o organizaciji i načinu obavljanja stručnih i administrativno-tehničkih poslova za potrebe Saveza,
- odlučuje o sistemu, kalendaru i propozicijama takmičenja za sve uzrasne kategorije prvenstva i Kup-a Bosne i Hercegovine;
- osniva stalna i povremena radna tijela – komisije i potvrđuje im program rada;
- imenuje i razrješava predsjednike i članove stalnih privremenih komisija i radnih tijela;
- donosi Pravila i propozicije organizovanja i provođenja prvenstvenih takmičenja Saveza;
- predlaže Skupštini donošenje srednjoročnog plana i programa razvoja;
- donosi odluke o dodjeli priznanja, pohvala i nagrada;
- donosi Poslovnik o radu Upravnog odbora Saveza;
- daje tumačenja opštih akata Saveza;
- bira i razrješava direktore i trenere državnih selekcija;
- odlučuje i o drugim pitanjima u skladu sa zakonom i ovim Statutom i koja mu u nadležnost stavi Skupština Saveza;
- rješava po zahtjevima članova u prvom stepenu;
- u skladu sa FIBA propisima i standardima stara se o politici razvoja i unapređenja trenerskog i sudijskog kadra;
- priprema sjednice Skupštine;
- priprema i podnosi izvještaj o svom radu Skupštini.

#### **Član 34.**

Upravni odbor radi u sjednicama i u skladu sa Poslovnikom o radu. Radom sjednice Upravnog odbora rukovodi predsjednik Upravnog odbora, a u slučaju njegove odsutnosti ili spriječenosti, jedan od potpredsjednika. Sjednice Upravnog odbora održavaju se po potrebi, a najmanje jednom u tri mjeseca.

Sjednice Upravnog odbora saziva predsjednik:

- po sopstvenoj ocjeni, a uz saglasnost dva potpredsjednika;
- na zahtjev neke od članova Saveza;
- na zahtjev najmanje 1/3 članova Upravnog odbora.

#### **Član 35.**

Kvorum Upravnog odbora je natpolovična većina svih članova Upravnog odbora.

Upravni odbor donosi odluke natpolovičnom većinom ukupnog broja prisutnih članova, pod uslovom da za prijedlog glasaju najmanje po 2 člana iz Košarkaškog Saveza Herceg-Bosne i Košarkaškog saveza Republike Srpske, i 2 člana iz Košarkaškog saveza Zenica, Košarkaškog saveza Kantona Sarajevo i Regionalnog košarkaškog saveza Tuzla.

#### **Član 36.**

Za pripremu prijedloga i stručnu obradu pojedinih pitanja iz svoje nadležnosti, Upravni odbor ima stalna i povremena stručna tijela u svome radu.

Stalna tijela Saveza su:

- Stručni savjet
- Međunarodna komisija
- Sudijska komisija
- Takmičarska komisija
- Komesarska komisija
- Trenerska komisija
- Arbitražna komisija
- Disciplinski sud
- Zdravstvena komisija.

Upravni odbor može imenovati i druga radna tijela i pojedince za realizaciju poslova i zadataka za koje se ukaže potreba.

Način rada i sastav radnih tijela iz prethodnog stava utvrđuje se odlukom Upravnog odbora.

### **3. NADZORNI ODBOR**

#### **Član 37.**

Savez ima Nadzorni odbor koji prati zakonitost rada Saveza.

Nadzorni odbor ima tri člana, bira ga Skupština Saveza na mandatni period od 4 (četiri) godine sa mogućnošću reizbora.

Članovi Nadzornog odbora ne mogu biti članovi Upravnog odbora Saveza.

#### **Član 38.**

Nadzorni odbor:

- vrši nadzor nad usklađenosti odluka i drugih akata Skupštine, Upravnog odbora i drugih organa i tijela sa Statutom Saveza,
- vrši nadzor nad sprovođenjem Statuta i drugih normativnih akata Saveza,
- vrši nadzor nad pribavljanjem, korištenjem i raspolaganjem materijalno-finansijskim sredstvima Saveza,
- ostvaruje uvid u finansijsko poslovanje, pregleda završni račun i daje svoje mišljenje,
- o svom radu podnosi izvještaj Skupštini najmanje jednom godišnje.

Nadzorni odbor održava sjednice po potrebi, obavezno jednom godišnje.

#### **Član 39.**

Sjednice Nadzornog odbora saziva predsjednik Nadzornog odbora po sopstvenoj ocjeni, na zahtjev predsjednika Saveza ili Upravnog odbora Saveza.

Nadzorni odbor radi u sjednicama i kvorum je natpolovična većina svih članova Nadzornog odbora, s tim da oba predstavnika ne mogu biti iz istog entiteta.

Kvorum nadzornog odbora čini nadpolovična većina svih članova Nadzora odbora.

Nadzorni odbor donosi odluke većinom glasova ukupnog broja članova Nadzornog odbora Saveza.

### **4. PREDSJEDNIK SAVEZA**

#### **Član 41.**

Savez ima predsjednika i dva potpredsjednika koje bira Skupština Saveza na mandat od 4 (četiri) godine sa mogućnošću reizbora.

Predsjednik i oba potpredsjednika se biraju po jedan (1) iz košarkaškog saveza Republike Srpske i Košarkaškog saveza Herceg Bosne i jedan (1) iz Košarkaškog saveza Kantona Sarajeva, Regionalnog košarkaškog Saveza Tuzla i Košarkaškog saveza Zenica.

Kandidate za predsjednika i potpredsjednike Saveza kandiduju članovi Saveza.

#### **Član 42.**

Predsjednik i potpredsjednici se rotiraju svakih 16 (šesnaest) mjeseci.

Predsjednik poslije 16 mjeseci provedenih na toj funkciji, postaje drugi potpredsjednik i završava mandat kao prvi potpredsjednik.

Prvi potpredsjednik poslije 16 mjeseci provedenih na toj funkciji, postaje predsjednik i završava mandat kao drugi potpredsjednik.

Drugi potpredsjednik poslije 16 mjeseci provedenih na toj funkciji postaje prvi potpredsjednik, a završava mandat kao predsjednik.

Savez je dužan prijaviti nastalu promjenu Ministarstvu pravde Bosne i Hercegovine uz dostavljanje odluke o imenovanju novog predsjednika Saveza kao lica ovlaštenog za zastupanje Saveza u pravnom prometu.

#### **Član 43.**

Predsjednik Saveza:

- zastupa i predstavlja Savez;
- saziva sjednice Upravnog odbora Saveza i predsjedava im
- potpisuje opšta i druga akta koje donosi Upravni odbor
- prati provođenje programa rada Saveza, kao i odluka i zaključaka Skupštine i Upravnog odbora Saveza
- obavlja i druge poslove koje mu provjeri Skupština i Upravni odbor.

#### **Član 44.**

U slučaju spriječenosti predsjednika Saveza, zamijenit će ga jedan od potpredsjednika u svim poslovima iz člana 42. u okviru datih ovlaštenja, izuzev poslova zastupanja Saveza u pravnom prometu.

Predsjednik i potpredsjednici Saveza su za svoj rad odgovorni Skupštini Saveza.

Predsjednik i potpredsjednici Saveza su ujedno i predsjednik i potpredsjednici Upravnog odbora Saveza.

### **5. GENERALNI SEKRETAR**

#### **Član 45.**

Savez ima Generalnog sekretara kojeg imenuje Upravni odbor Saveza na mandatni period od 4 (četiri) godine sa mogućnošću reizbora.

#### **Član 46.**

Generalni sekretar obavlja sljedeće poslove:

- zastupa i predstavlja Savez;
- stara se i preuzima mjere za realizaciju plana i programa Saveza kao i provođenje odluka Skupštine, Upravnog odbora i njihovih radnih tijela;
- ostvaruje saradnju sa međunarodnom košarkaškom federacijom (FIBA) i sa članovima Saveza, državnim sportskim i drugim organizacijama;
- brine o materijalno-finansijskim sredstvima Saveza i odgovoran je za njihovo zakonito i racionalno korištenje;
- obavlja stručne poslove i rukovodi radom stručne službe;
- brine o realizaciji odluka i zaključaka Skupštine, Upravnog odbora i njihovih organa i tijela;
- priprema sjednice Skupštine i Upravnog odbora, kao i njihovih radnih tijela;
- obavještava javnost i sredstva informisanja o radu Saveza i njegovih organa;
- ovjerava i potpisuje takmičarske dokumente za Prvenstvo BiH, završnicu KUP-a, u skladu sa propisima o registraciji i FIBA pravilima;
- brine o odlaganju i čuvanju dokumentacije Saveza;
- obavlja i druge poslove koji su mu stavljeni u obavezu od strane Skupštine, Upravnog odbora i predsjednika Saveza.

Generalnog sekretara u slučaju njegove odsutnosti zamjenjuje lice koje odredi Upravni odbor u svim poslovima iz stava 1. ovog člana u okviru datih ovlaštenja, izuzev poslova zastupanja Saveza u pravnom prometu.

#### **Član 47.**

Generalni sekretar učestvuje u radu svih organa Saveza bez prava odlučivanja.

Generalni sekretar za svoj rad neposredno odgovara Upravnom odboru Saveza.

#### **Član 48.**

Upravni odbor može razriješiti dužnosti Generalnog sekretara prije isteka mandata ako utvrdi da ne izvršava zadatke i obaveze koje su mu povjerene ili ako se steknu neki drugi objektivni razlozi za takvu odluku.

### **VI. STRUČNA SLUŽBA SAVEZA**

#### **Član 49.**

Stručne, administrativno-tehničke, materijalno-finansijske i pomoćne poslove Saveza obavlja Stručna služba Saveza.

Neke od navedenih poslova iz stava 1. ovog člana mogu obavljati lica ili organizacije izvan Saveza, što se reguliše posebnom odlukom Upravnog odbora.

Lica zaposlena u Stručnoj službi Saveza zasnivaju radni odnos u Savezu i ostvaruju svoja prava iz radnog odnosa u skladu sa Zakonom o radu u institucijama Bosne i Hercegovine i opštim aktima Saveza.

### **VII. PRAVILA ZA OSTVARIVANJE, KORIŠTENJE I RASPOLAGANJE SREDSTVIMA SAVEZA, KAO I ORGAN KOJI JE OVLAŠTEN ZA NADZOR NAD KORIŠTENJEM TIH SREDSTAVA**

#### **Član 50.**

Sredstva Saveza su:

- novčana sredstva;
- nepokretna i pokretna imovina Saveza.

#### **Član 51.**

Savez može ostvariti sredstva:

- iz državnih grantova i ugovora sa državom, javnim institucijama, domaćim i stranim fizičkim i pravnim licima;
- iz dobrovoljnih priloga i poklona javnih institucija, fizičkih i pravnih lica, kako inostranih tako i domaćih, u gotovini, uslugama ili imovini bilo koje vrste;
- iz prihoda od kamata, dividendi, dobiti od kapitala, zakupnina, honorara i sličnih izvora pasivnog prihoda;
- od igara na sreću u skladu sa propisima;
- od članarina i kotizacija;
- iz prihoda stečenih kroz ostvarivanje ciljeva i aktivnosti Saveza, kako je određeno Statutom, kao i iz drugih izvora finansiranja u skladu sa propisima;
- iz prihoda stečenih aktivnosti sportske organizacije utvrđenih Statutom.

#### **Član 52.**

Obim, namjena i raspodjela finansijskih sredstava utvrđuje se finansijskim planom Saveza kojeg donosi Skupština, na prijedlog Upravnog odbora.

O upotrebi sredstava, u skladu sa finansijskim planom odlučuje Upravni odbor.

Sredstva Saveza se mogu upotrebljavati isključivo radi ostvarivanja ciljeva i djelatnosti Saveza.

Savez je dužan voditi poslovne knjige i podnositi finansijske izvještaje u skladu sa propisima kojima se uređuje računovodstvo neprofitnih organizacija. Savez podnosi godišnji finansijski izvještaj Skupštini, na način utvrđen Statutom.

Finansijski izvještaj iz stava (4) ovog člana Savez je dužan čuvati najmanje pet godina, osim ako posebnim propisom nije utvrđen duži period čuvanja.

Savez mora učiniti dostupnim javnosti sve informacije koje se tiču rada i djelovanja Saveza, u skladu sa pozitivnim zakonodavstvom.

#### **Član 53.**

Nadzor nad upotrebom i raspolaganjem sredstava vrši Nadzorni odbor Saveza.

Predsjednik Nadzornog odbora je dužan o pravilnosti i ispravnosti trošenja sredstava Saveza izvještavati Skupštinu Saveza najmanje jednom godišnje. O svakoj uočenoj nepravilnosti u trošenju i raspolaganju sredstvima Nadzorni odbor je dužan odmah izvijestiti predsjednika Saveza koji će u roku od 15 dana sazvati vandredu Skupštinu.

### **VIII. JAVNOST RADA**

#### **Član 54.**

Rad Saveza zasniva se na načelima javnosti.

Saradnja sa medijima obavezna je za sve članove Saveza, organe i radna tijela.

Informisanje o aktivnostima Saveza ostvaruje se izdavanjem biltena, dostavljanjem informacija medijima, internetom, pisanim informacijama, izvještajima i saopštenjima.

Za javnost rada Saveza odgovoran je Upravni odbor.

## **IX. POSTUPAK ZA IZMJENU I DOPUNU STATUTA, OVLAŠTENJE I NAČIN DONOŠENJA DRUGIH OPŠTIH AKATA**

### **Član 55.**

Inicijativu za izmjene i dopune Statuta Saveza može podnijeti najmanje jedna od članova Saveza, Upravni odbor ili 1/3 članova Skupštine.

Inicijativa se podnosi Upravnom odboru pismenim putem sa odgovarajućim obrazloženjem.

Utvrđeni prijedlog dostavlja se Skupštini, najmanje 30 dana prije održavanja sjednice Skupštine.

O izmjenama i dopunama odlučuje Skupština u skladu sa članom 30. stav 3. ovog Statuta.

Skupština i drugi organi Saveza, svaki iz svoje nadležnosti, mogu donositi opšte ili pojedinačne akte, koja se odnose na njihov rad, u skladu sa Zakonom i ovim statutom, kao što su pravilnici, poslovnici, odluke, zaključci.

## **X. PEČAT I ZNAK SAVEZA**

### **Član 56.**

Pečat Saveza je okruglog oblika, promjera 30mm, sa ispisanim tekstom na obodu, KOŠARKAŠKI SAVEZ BOSNE I HERCEGOVINE, Sarajevo / КОШАРКАШКИ САВЕЗ БОСНЕ И ХЕРЦЕГОВИНЕ, Сарајево. Tekst je ispisan latinicom i ćirilicom, a u sredini je znak Saveza.

### **Član 57.**

Savez ima znak.

Znak Saveza je oblika izduženog pravougaonika, plavo žute boje. Sa lijeve strane je šest bijelih zvijezdica, a u sredini silueta košarkaša u skoku. Ispod znaka je naziv KS BiH.

## **XI. ZASTUPANJE I PREDSTAVLJANJE SAVEZA**

### **Član 58.**

Savez zastupaju u pravnom prometu Generalni sekretar i Predsjednik Saveza.

## **XII. DRŽAVNE REPREZENTACIJE**

### **Član 59.**

Skupština Saveza, njeni organi i tijela su obavezni da vode brigu o reprezentativnim selekcijama BiH u svim kategorijama i stvaranju uslova u cilju postizanja što boljih rezultata.

#### **Član 60.**

Pravilnik o Državnim reprezentacijama BiH reguliše način izbora stručnih štabova reprezentativnih selekcija, poslove i zadatke izabranih, kao i njihovu odgovornost za stručan i pravilan rad, te druga pitanja od interesa za uspješan rad reprezentativnih selekcija.

Pravilnik o državnim reprezentacijama BiH donosi Upravni odbor Saveza.

### **XIII. DOPING KONTROLA**

#### **Član 61.**

U cilju spriječavanja upotrebe nedozvoljenih sredstava Savez će, u skladu sa propisima FIBA, Agencijom za antidoping kontrolu BiH i odlukama Upravnog odbora Saveza, provoditi doping kontrolu na prvenstvenim i drugim takmičenjima u organizaciji Saveza ili nekog od udruženih saveza.

#### **Član 62.**

Savez dozvoljava FIBA i Agenciji za antidoping kontrolu BiH da provodi doping kontrolu izvan takmičenja na košarkašima članovima košarkaških organizacija udruženih u Savez.

### **XIV. USLOVI I POSTUPAK ZA SPAJANJE I PODJELU ODNOSNO PRESTANAK RADA SAVEZA UKLUČUJUĆI I BILO KAKAV POSEBAN KVORUM ILI PRAVILA ZA POSTIZANJE KVALIFIKOVANE VEĆINE U POSTUPKU GLASANJA**

#### **Član 63.**

Savez se može spojiti ili podijeliti u drugi savez ili udruženje u skladu sa Zakonom i ovim Statutom.

Odluku o statusnoj promjeni iz prethodnog stava donosi Skupština dvotrećinskom većinom svih članova Skupštine Saveza.

Odlukom i prethodnog stava će se naročito regulisati naziv i sjedište, djelatnost, podjela imovine, prava i obaveze, kao i druga pitanja koja se odnose na statusnu promjenu Saveza.

#### **Član 64.**

Savez prestaje sa radom dobrovoljno ili po sili Zakona.

Inicijativu za dobrovoljni prestanak rada Saveza može dati jedan od udruženih članova, Upravni odbor ili 1/3 delegata Skupštine Saveza u slučaju ako je:

- proteklo dvostruko više vremena od vremena utvrđenog Statutom za održavanje Skupštine, a Skupština nije održana;
- ako se broj udruženih članova smanji ispod Zakonom dozvoljenog, a nadležni organ Saveza u roku od tri mjeseca od nastupanja ove okolnosti ne donese odluku o prijemu novih članova Saveza.

Odluku o dobrovoljnom prestanku donosi Skupština 2/3 većinom svih delegata Skupštine Saveza.

#### **Član 65.**



Savez pre staje sa radom po sili Zakona u skladu sa članom 50. i 51. Zakona.  
Savez je dužan svaku statusnu promjenu prijaviti nadležnom ministarstvu u roku utvrdjenom Zakonom.

#### XV. POSTUPAK ZA RASPOLAGANJE PREOSTALOM IMOVINOM ILI DRUGIM SREDSTVIMA U SLUČAJU RASPUŠTANJA ILI PRESTANKA RADA SAVEZA

##### Član 66.

U slučaju donošenja odluke o prestanku rada Saveza, Skupština Saveza donosi plan likvidacije Saveza, kojim se utvrđuje raspored imovine, prava i obaveze Saveza.

Skupština donosi odluku o imenovanju likvidatora čija je dužnost, da se stara o izvršenju plana likvidacije i ovlaštenje da zastupa Savez u postupku likvidacije i u postupku podnošenja zahtjeva za odluku o prestanku rada Saveza nadležnim organima.

Imovina kod raspuštanja i prestanka rada Saveza, nakon izmirenja zakonskih obaveza, donijeti će se nekome drugom udruženju koje obavlja iste ili slične statutarne djelatnosti koje je imao Savez, o čemu odluka donosi Skupština.

#### XVI. PRELAZNE I ZAVRŠNE ODREDBE

##### Član 67.

Savez organizovan u skladu sa ovim statutom nastavlja kontinuirat članstva u FIBA i Olimpijskom komitetu BiH.

##### Član 68.

Svi opšti i provedbeni akti Saveza uskladiće se sa Statutom, najkasnije u roku od šest mjeseci od dana stupanja na snagu ovog Statuta.

##### Član 69.

Tumačenje odredbi ovog Statuta daje Skupština Saveza.

##### Član 70.

Ovaj Statut stupa na snagu danom donošenja.

Danom stupanja na snagu ovog Statuta, prestaje da važi Statut Košarkaškog saveza Bosne i Hercegovine, broj: 02/09 od 27.03.2009. godine.

Broj: PO1-811/18  
Buzovača, 20.10.2018. godine



Predsjednik Skupštine

*[Handwritten signature]*  
Balkonović

**OVJERAVA**  
Ministarstvo pravde  
Bosne i Hercegovine

Broj: UP09-07-1-2858/18  
Sarajevo, 08.04.2019.godine

POMOĆNIK MINISTRA

Fazila Mustić

